

«I dat bler goodwill per il rumantsch»

DAVID TRUTTMANN/FMR

■ **Ussa èsi decis: Diego Deplazes è il nov «capo rumantsch». El succeda a Martin Gabriel sco secretari general da la Lia Rumantscha. El vegn a surpigliar quella incumbensa per zercladur 2021. La FMR ha discuri cun Diego Deplazes davart sia lectura dal davos temp, davart la tauna dal luf e davart Clementina da Zernez.**

FMR: Tren u auto?

Diego Deplazes: (ri) Tren ed auto! Pli tost il tren, tut tenor basegn er l'auto. Però gea, sco secretari da la LR vegn jau a pendular regularmain en avegnir tranter Rabiis e Cuira.

Sco manader dad ina chasa da tgira avais Vos – en in temp cun la pandemia actuala – experientscha cun crisas. È il rumantsch en la crisa?

Tenor mai betg. I dat bler «goodwill» per il rumantsch. Era actualmain p.ex. sin nivel da la Confederaziun ch'è pronta da sustegnair pli ferm il rumantsch. En la politica dal chantun Grischun ves jau bleras persunas che s'engaschan a favur da las linguas.

Vus essas engaschè professiunalmain en las domenas da la sanadad e da la furmaziun. Quant essas Vos era interessà per cultura u politica da lingua?

La politica da linguas ma stat ferma- main a cor tar mes engaschament sco deputà. Jau hai m'engaschè en diversas

discussions. Jau na sun però betg ina persuna che vegn or da cultura profes- siunala. Sco passatemp e hobi è la cul- tura però fitg preschenta en mia vita: Jau hai chantà en chors e sunà en mu- sicas, hai p.ex. accompagnà cun ghtar- ra il chant en baselgia. Insumma, er sco scolast sun jau adina stà involvì stretg en la cultura e las tradiziuns dal vitg.

Savens vegn il post da secretari da la LR era circumscrib sco «mission im- possible» – Rumantschas e Ru- mantschs crititgeschan cun insistenza lur instituziun tetgala. N'avais betg tema dad ir en la tauna dal luf?

Na, tema segir betg. Però respect. Igl è ina nova sfida ed incumbensa. Jau hai fatg professiunalmain diversas midadas en diversas spartas – da la pedagogia en il sectur social, alura en la sanadad ed en la politica. Impurtant è da sa laschar en sin ina tematica, da tadlar, da bajegiar punts. Gist en la curatella hai duvrà bu- na comunicaziun e sensori per suste- gnair las persunas pertutgadas en lur mintgadi. Quellas experientschas pon segir gidar en il nov post. Damai, igl è in'incumbensa che jau prend serius e da la quala jau hai era respect.

Tenor la comunicaziun da la LR per Vossa elecziun As essas Vos cunvegnids da «proseguir la via che la LR ha en- chaminà ils davos onns». Vul dir che Vos sustegnais plainamain la strate- gia ch'è ussa preparada sin maisa?

Jau hai sa chapescha gia legi la nova strategia, sco deputà e commember da



«La politica da linguas
ma stat a cor.»

Diego Deplazes,
nov secretari general
da la Lia Rumantscha

la grupp rumantscha dal Cussegl grond. Il palpì è per il mument en consultaziun, i vegnan rimnadas las dif- ferentas posiziuns. Ussa vegn jau alura ad esser entretschà pli ferm en l'elavura- zion finala. A mai pari impurtant che la LR na vegnia betg mo identifitgada sur la dumonda rg u idioms. Quai n'è betg la suletta tematica. I dat anc autras te- maticas impurtantas.

Apunta: Diaspora, digitalisaziun, scola, «democratisar» la LR, ina nova strategia, las medias... I dat avunda lavur per il nov secretari. Nua vules- sas Vos metter l'accent?

Gea, il mument èsi plitost anc in vulair. Bler dependa sa chapescha da la stra- tegia che resulta la fin dals quints, ina strategia vasta. A mai pari impurtant che Rumantschas e Rumantschs vegn- ian facil tar lur lingua, sch'els dovran il rumantsch en il mintgadi. Simplifitgar il diever dal rumantsch.

Per exempel?

Per exempel cun vocabularis che pussi- bilitesch in access pli simpel, u alura cun instruments per dictar il ru- mantsch, damai projects da digitalisa- zion che vegnan realisads era cun autras organisaziuns ed instituziuns.

Vus essas en la suprastanza da la Pro Idioms Surselva ch'ha cumbattì l'alfa- betisaziun da la lingua da standard. Co vesais Vos la rolla dals idioms e quella dal rg?

Jau vegn ad extrar da la suprastanza – perquai che sco secretari da la LR hai jau in'otra rolla. Jau na vulesch betg sur- valitar la problematica. Las decisziuns en scola èn crudadas a favur dals idioms. Il rg ha sia legitimaziun – p.ex. tar la com- municaziun da chantun e Confederazi- un u la comunicaziun interruman- tscha. Però tar la LR duai en cas speci- fics era avair piazza l'idiom. I na po betg esser che l'instituziun vegnia identifitga- da be sur il rg. La LR è dapli.

Prendain ina persuna fictiva: Cle- mentina, 25 onns da Zernez, emp- lojada da commerzi – tge dovra quel- la da la Lia Rumantscha?

Ella dovra ina preschientscha da la LR era en sia regiun, ella sto savair tge che la LR è e tge ch'ella fa. Ella duai percor- scher che la LR stat en per ses interess, ch'ella vegn represchentada da quell'or- ganisaziun, che quella stat en per ses dretgs.

Per finir: Tgenin è il davos text u cu- desch rumantsch che Vos avais legi?

Il davos temp ha jau legi blers texts da gasetta. Jau sun insumma plitost il lec- tur da gasetta che da cudeschs. Ed il davos temp n'hai jau insumma betg gi temp da leger bler auter che texts en connex cun mia professiun, davart corona e sanadad.

Curt e setg

(fmr/cdm) Diego Deplazes (47) da Rabiis è manader dal Center da sa- nadad Puntreis a Mustér. Oriunda- main ha el emprèndi scolast. Suentar avair instrui sin differents stgalims ha Deplazes manà plirs onns la Curatel- la professiunala Surselva. Dapi l'onn 2018 è Diego Deplazes deputà da la PCD en il Cussegl grond.

Tratga preferida: capuns
Bavronda preferida:
in glas vin cotschen

Lieu preferi: Lag Serein
Musica preferida: Musica svizra da
«Mundart» u ils chantauturs ru- mantschs, sco p.ex. Mario Pacchioli.